

Sakspapir

Saksbehandler	Arkiv	ArkivsakID
Jan Erik Boge	FE-231	20/890

Saksnr	Utvalg	Type	Dato
052/2020	Formannskapet	PS	12.11.2020
100/2020	Kommunestyret	PS	03.12.2020

Diverse kommunale avgifter og gebyr 2021

Vedlegg:

Kommunale avgifter og gebyr 2021

Saksopplysninger:

Dokument som ikke er vedlagt:

Betalingsregulativ/oversikt over kommunale avgifter og gebyr for 2020

Kva saka gjeld:

Kommunen tilbyr og utfører ei rekkje tenester for innbyggjarane og andre som oppheld seg i kommunen. Nokre av desse tenestene krev kommunen betaling for. Det er ulike reglar for korleis kommunen kan ta betalt for tenestene. For nokre tenester er det staten som bestemmer satsane. Dette gjeld for eksempel maksimumspris for barnehageplass, og for nokre grupper også betaling for heimebaserte tenester.

For andre tenester har staten sett som føresetnad at brukaren betalar det tenesta kostar. Dette vert gjerne kalla sjølvkostprinsippet. Dette gjeld dei fleste tenester som eining for samfunnsutvikling og teknisk drift kan ta betalt for. Definisjon av sjølvkost er den totale kostnaden som ein kommune får ved å produsere ei bestemt vare eller teneste, uavhengig av finansieringsform. Det er også eit prinsipp at ein generasjon ikkje skal subsidiera eller bli subsidiert av neste generasjon. Det er fleire forskjellige sjølvkostområde. For nokre av desse områda, for eksempel tømning av slamavskiljarar, er det lovmessig krav om at sjølvkost skal danne grunnlaget for brukarbetaling. For andre område, for eksempel vatn og avløp, er ikkje kommunen pålagt full kostnadsdekning, og kan finansiera desse gebyrområda med andre driftspengar. Kommunen kan derimot påleggja seg sjølv å ha full kostnadsdekning. Samnanger kommune har hatt som prinsipp at det så lang som mogleg skal vera full sjølvkost på alle gebyrområde der sjølvkost set den øvre ramma for brukarbetaling.

For ein del tenester er det heilt opp til kommunen å fastsetja betalingssatsane. Kommunen kan òg velja å ikkje ta betalt for nokre tenester.

Administrasjonen kjem kvart år med framlegg til satsar for dei fleste kommunale avgiftene/gebyra. Formannskapet handsamar administrasjonen sitt forslag og gir tilråding til kommunestyret, som gjer endeleg vedtak. Det har dei siste åra variert om kommunale avgifter/gebyr har vorte lagt fram som eiga sak, eller om det har vore ein del av saka om budsjett og økonomiplan. For 2021 har administrasjonen valt å leggja fram saker om kommunale avgifter/gebyr som eigne saker.

Kyrkjestyret/soknerådet vedtek framlegg til festeavgifter m.m. på kyrkjegarden, men det er kommunestyret som gjer endeleg vedtak også om desse satsane.

Denne saka gjeld avgifter og gebyr for følgjande tenester/tilbod:

- Heimebaserte tenester
- Matombringning
- Tryggleiksalarm/elektroniske dørlåsar
- Makspris på institusjonsopphald (sjukeheim)
- Barnehagetilbod
- Skulefritidsordning
- Kulturskulen
- Kopiering
- Gebyr for omsetning av alkoholhaldig drikk
- Gebyr for sals- og skjenkeløyve
- Gebyr for omsetning av tobakk
- Purregebyr
- Bruk av idrettsanlegget i Hagabotnane
- Symjebassenget
- Utleige av kommunale bygg
- Takstar for attkasting på kyrkjegarden
- Feiing og tilsyn
- Vatn
- Avløp/kloakk
- Slamtømming

I tillegg til denne saka om diverse avgifter og gebyr for 2021, vert òg følgjande andre saker om avgifter og gebyr for 2021 lagt fram for politisk handsaming:

- Gebyrregulativ 2021 for bygge- og delingssaker, plansaker og saker etter matrikkellova og forureiningslova
- Regulering av husleige i kommunale bygg
- Renovasjonsgebyr 2021

Administrasjonen tek sikte på å leggja fram ei eiga sak om brukarbetaling for velferdsteknologi i løpet av første halvår 2021. Administrasjonen ynskjer ein ny gjennomgang av betaling for opphald på dagsenteret og dette vil kome opp som eiga sak i løpet av første halvår 2021. Fram til desse sakene er lagt fram, vil prisane bli justert på vanleg måte med verknad frå 01.01.21.

Vurderingar og konsekvensar:

Administrasjonen har lagt inn forslag om ein auke på 2,7 prosent i dei fleste satsane for kommunale avgifter/gebyr for 2021. Bakgrunnen for dette er at det er denne satsen som er brukt som deflator (samla pris- og kostnadsvekst i kommunane) i framlegget til statsbudsjett for 2021.

Gebyr for sjølvkostområda vatn, avløp og slam vert berekna særskilt og tek omsyn til mellom anna planlagte investeringar, storleiken på fond og forventa tal abonnentar. Kloakkavgift (avløp) vert foreslått auka med 5 % prosent. Avgifter for vatn vert auka med 3 % og avgift for slam og septiktanktømming vert foreslått redusert med 10 %. Sjølvkostområdet i Eikedal får ein auke på 5 % på vatn og avløp.

Nedanfor følgjer informasjon om bakgrunnen for rådmannen sitt forslag for ein del av avgiftene/gebyra:

- **Heimebaserte tenester og korttidsopphald på sjukeheim:** vert regulert i samsvar med staten sine maksimumssatsar som truleg vert klare i slutten av desember 2020. Dette gjeld for dei som har lågare inntekt enn 2 G. For dei som har høgare inntekt enn 2 G vert satsane foreslått auka med 2,7 prosent.
- **Matombringing** Fleire av brukarane har eit ynskje/ behov for å få levert andre måltid enn middag, mellom anna lunsj og kvelds. Dette er allereie starta opp og vert levert ut av heimeteneste/heimesjukepleie. Satsane for middag m/ dessert vert auka med 2,7 % og det vert lagt til nye gebyr for andre måltid.
- **Tryggleiksalarm.** Dette er blitt fakturert kvartalsvis på etterskot. Det vert foreslått å gå over til å fakturera dette månadleg på etterskot. Prisauke på 2,7 %. Tryggleiksalarm vil inngå i sak om velferdsteknologi.
- **Maksimalpris for langtidsopphald ved sjukeheimen:** vert foreslått regulert med 2,7 prosent.
- **Barnehageplass:** det vert foreslått at Samnanger framleis skal bruka maksimalsatsen som vert regulert av staten.
- **Mat barnehage:** vert foreslått auka med 2,7 prosent. Her inngår frukt som ein del av tilbodet.
- **Skulefritidsordning (SFO):** det vert foreslått å auka årssatsane med 2,7 prosent. Det vert vidare foreslått at kommunen med verknad frå august 2021 skal gå over frå betaling fordelt på 11 månader til betaling fordelt på 10 månader, med juli og august som betalingsfrie månader. Som følgje av overgangen til betaling fordelt på 10 månader, vil satsen pr. måned auka frå september 2021. Frå hausten 2020 har staten innført ordning med inntektsgradert foreldrebetaling. Dette vert utvida til og å gjelde born i 3. og 4.klasse frå hausten 2021.
- **Gebyr for sein henting i barnehage og SFO:** det vert foreslått auka gebyret med 2,7 prosent.
- **Kulturskule:** vert foreslått regulert med 2,7 prosent.
- **Kopiering:** det vert foreslått å ikkje auka satsane for kopiering av dokument.
- **Takstar for bruk av idrettsanlegget i Hagabotnane:** det vert foreslått å auka satsane med 2,7 prosent.
- **Symjebasseng:** det vert foreslått å ikkje auka satsane. Satsane vil då framleis vera 50 kroner for vaksne og 30 kroner for born. Det er Røde Kors som er badevakt i bassenget og som får billettinntektene.
- **Utleige av kommunale bygg:** det vert foreslått å auka satsane med 2,7 prosent.
- **Avgifter på kyrkjegarden:** kyrkjestyret foreslår å ikkje auka festeavgiftene. Avgiftene for gravlegging for dei som var busett utanfor Samnanger vert foreslått auka med kr 100 for vanleg kistegrav (1,6 %) og barnegrav (2,0 %). Det er ikkje foreslått endring i prisen for urnegrav.
- **Feiing:** det vert foreslått å auka satsane med 2,7 prosent.
- **Vassavgifter:** vert foreslått å auka årsavgift og påkoplingsgebyr med 3 %. Gjennomgang av direkte lønsutgifter i 2019 viste at del som vert ført på sjølvkostområdet vatn måtte aukast opp. Det er og gjennomført og planlagt fleire investeringar dei neste åra. Dette gjer at avgiftene må aukast med om lag 3 % dei neste åra. Det som vil påverka prisutviklinga er mellom anna tal abonnentar, investeringar og generell renteutviklinga.
- **Kloakkavgifter:** vert foreslått auka årsavgift og påkoplingsgebyr med 5%. Som for vatn vart det endring i føring av direkte lønsutgifter på avløp frå og med 2019. Fondet vart brukt opp i 2019 og kommunen er avhengig av å få på nye abonnentar for å unngå ytterlegare prisauke. Det er planlagt fleire utbyggingar dei neste åra som skal sikre ein jamn prisutvikling.
- **Slam:** vert foreslått redusert med 10 %. Kommunen gjekk for nokre år sidan over til å fakturera septiktanktømming kvartalsvis (årleg for hytter) i staden for etter at tømming var gjort, vanlegvis anna kvart år. Dei som er tilkopla kommunale slamavskiljarar har heile tida

betalt kvartalsvis. Denne endringa i korleis gebyret vart fakturert gjer at inntektene er stabile medan utgiftene varierer. Slam- og septiktankgebyret vart halvert i 2019 for å auke opp fondsbruken. Me ser at det ikkje var stor nok prisreduksjon til at dette sjølvkostområdet er i balanse og det vert foreslått å redusera prisen i 2021 med 10 %.

· **Vass- og kloakkavgifter for eigedomar som er knytt til Kvam sitt VA-anlegg i Eikedalen:**

Det er vedtatt at dette skal vere eige sjølvkostområde. Dei første åra var gebyret som i Kvam med eit lite påslag. Dette vart endra frå 2020 då me såg at kommunen hadde utgifter som ikkje vart dekkja inn. Dette gjeld mellom anna investeringar som ikkje kjem inn under avtala kommunen har med Kvam. Det er derfor nødvendig å auka gebyret både på vatn og avløp for å sikra sjølvkost. I 2020 var det ein større prosentvis auke, men årsgebyra og påkoplingsgebyr i dette sjølvkostområdet er langt lågare enn i resten av Samnanger kommune. Begge områda gjekk med underskot i 2019 og det er nødvendig å auka gebyret i 2021 med 5 %.

Sjå vedlagt oversikt for fleire detaljar. Her er satsane for 2020 med som informasjon. Desse vert fjerna når nye satsar er endeleg vedtekne.

Forslag til vedtak:

Rådmannen sitt framlegg til vedtak:

Kommunale avgifter og gebyr for 2021 vert fastsette i samsvar med vedlagte framlegg til betalingsregulativ. Generell auke er 2,7 % når ikkje noko anna går fram av regulativet. Regulativet gjeld frå og med 01.01.2021.

Formannskapet - 052/2020

FORM - behandling:

Rådmannen sitt framlegg vart samrøystes vedteke.

FORM - vedtak:

Kommunale avgifter og gebyr for 2021 vert fastsette i samsvar med vedlagte framlegg til betalingsregulativ. Generell auke er 2,7 % når ikkje noko anna går fram av regulativet. Regulativet gjeld frå og med 01.01.2021.

Kommunestyret - 100/2020

KS - behandling:

Formannskapet si tilråding vart samrøystes vedteke.

KS - vedtak:

Kommunale avgifter og gebyr for 2021 vert fastsette i samsvar med vedlagte framlegg til betalingsregulativ. Generell auke er 2,7 % når ikkje noko anna går fram av regulativet. Regulativet

gjeld frå og med 01.01.2021.

, den 03.11.2020

Jan Erik Boge
leiande rådgjevar